

## **UDRUŽENJE RADI ZAŠTITE ISTINE O ODBRAMBENOM RATU**

Još u toku agresije na BiH, kada su Armiju i njene pripadnike zbog, za mnoge iznenađujuće uspješnog otpora agresiji sa istoka i do 1994. godine i sa zapada, nazivali "čudom bosanskog otpora", mogao se nazrijeti budući nepravedan i omalovažavajući odnos institucija vlasti, medija i drugih struktura bosansko-hercegovačkog društva prema svojim braniocima. I tada, kada je od rezultata Armije ovisila opstojnost države BiH i njenih naroda, borci i njihove porodice su u rješavanju socijalnih problema bili iza onih koji su se "snašli" u jedinicama radne obaveze, civilnoj zaštiti ili raznim humanitarnim i drugim organizacijama. Tadašnji predsjednik Predsjedništva RBiH Alija Izetbegović je jednom prilikom rekao da su u ratu u prvom planu borci, a iza njih političari, ratni profiteri i dr. te da se u miru redosljed mijenja i borci ostaju na zadnjem mjestu.

### **HEROJI ODBRANE U NEMILOSTI VLASTITE DRŽAVE**

Mada ni u ratu nismo bili na prvom mjestu, mi borci Armije RBiH i MUP-a RBiH nismo mogli ni zamisliti, da ćemo nekoliko godina nakon okončanja odbrambenog rata, mi koji smo svojim životima, hrabrošću i patriotizmom branili i odbranili opstojnost BiH morati ponovo "ustati" da bi zaštitili istinu o herojskoj borbi Armije protiv fašizma, a svoje saborce od napada, omaložavanja i nepravdi.

Smatrali smo da će naša država, za koju smo se borili, i njene institucije kojima smo mi osigurali mogućnost konstituisanja i djelovanja, štiti istinu o našoj bliskoj historiji te zaslužena prava boraca, njenih ključnih aktera ako ni zbog čega onda bar radi sopstvene koristi, opstanka na vlasti. Valjda je bar to svima jasno da smo mi, nekadašnji pripadnici oružanih snaga RBiH, Armije i MUP-a, najbrojnija glasačka mašinerija u zemlji i da se samo uz naše glasove može računati na vlast. Međutim, to izgleda nisu shvatile ni stranke koje su bile na vlasti do 2001. godine, a pogotovo ne stranke u Alijansi za promjene koje su došle na vlast zahvaljujući u velikoj mjeri nezadovoljavajućem odnosu svojih predhodnika prema boračkoj populaciji. Mada su i glasovima boraca stranke Alijanse za promjene došle na vlast, one su nam odmah po ustoličenju uzvatile omaložavanjem, deložacijama, ukidanjem invalidnina, smanjenjem penzija, pokretanjem sudskih postupaka protiv istaknutih komandanata ili izručivanjem istinskih branilaca BiH na ponižavajući način Haškom tribunalu. Mediji su takođe promijenili ploču, čak i neki od njih kojima su Armija i njeni pripadnici bili odskočna daska u borbi za čitaoce.

Armija i njeni pripadnici su postali najpogodnija meta za odstrijel. Preko noći smo postali nacionalistička falanga, kriminalci i profiteri. Za nas nije bilo mjesta u institucijama vlasti, na upravljačkim mjestima u privredi, u upravnim odborima, niti na bilo kom mjestu u društvu koje je pružalo satisfakciju nama i našoj borbi za odbranu nezavisnosti BiH.

### **KRIMINALIZIRANJE BRANILACA**

Očekivali smo da će brojne boračke organizacije, transformisane i objedinjene imati više snage i da će odlučnije djelovati u zaštiti integriteta i istine o našoj borbi. Međutim, razjedinjene boračke

organizacije su bile opterećene i zaokupljene rješavanjem socijalno statusnih pitanja pojedinih kategorija boračke populacije te nisu "imale vremena" da se bave globalnim pitanjima odbrane BiH od agresije i ulozi odbrambenih snaga i branilaca u njoj.

Pokušali smo o obezvređivanju i kriminalizaciji odbrambenog rata i branilaca BiH razložno, trezveno i odgovorno razgovarati sa državnim i političkim funkcionerima, ali smo naišli ili na zatvorena vrata ili na formalno razumijevanje bez ikakvih konkretnih pokušaja da se navedeni propusti riješe.

Odgovorni pred narodom, svojim saborcima, državom i historijom, veća grupa bivših pripadnika Armije, MUP-a i građana patriota, odlučila je da stvar preuzme u svoje ruke. Na naše opredjeljenje je presudno uticalo bezosjećajno, nemoralno i necivilizacijsko izručenje istaknutih pripadnika Armije Envera Hadžihasanovića, rahmetli Mehmeda Alagića i Amira Kubure Haškom tribunalu.

Smatrajući da moramo stati u kraj falsifikovanju naše bliske historije, njenom iskrivljivanju i brisanju naočigled nas, direktnih aktera, odlučili smo da formiramo Udruženje građana, kao institucionalnu formu djelovanja lišenu političkih ambicija.

Kao nevladina i vanstranačka organizacija Udruženje za zaštitu tekovina borbe za Bosnu i Hercegovinu je otvorilo prostor za djelovanje građanima-patriotima BiH, dokazanih u borbi i opredjeljenih za dalju borbu za našu domovinu neovisno od njihove nacionalne, vjerske ili stranačke pripadnosti.

S obzirom da je prevashodni cilj Udruženja za zaštitu tekovina borbe za BiH globalna zaštita istine i rezultata odbrambenog rata 1992-1995 nije moglo doći do konflikata interesa sa drugim boračkim organizacijama. Naprotiv, članovi našeg Udruženja mogu postati pripadnici boračkih organizacija kao što smo i mi njihovi. Jedini kriterijum koji je bitan za pristup našem Udruženju je opredjeljenost i privrženost ideji cjelovite, nezavisne i demokratske BiH, odlučnost da se istina o borbi za opstojnost BiH 1992-1995 brani svim dopuštenim civilizacijskim i demokratskim sredstvima te spremnost za borbu za svjetlu i perspektivnu budućnost naše domovine.

Nasuprot navedenom, član Udruženja ne može postati onaj koji se iskazao ili iskazuje kao protivnik ili negator historijskih tekovina borbe za BiH.

## **VALORIZACIJA ISTINE**

U borbi za očuvanje istine o odbrambenom ratu i valorizaciji doprinosa branilaca BiH i zaustavljanja obespravljivanja i kriminalizacije Armije i njenih pripadnika zbog dnevno političkih, personalnih ili interesa određenih političkih struktura, mi smo spremni za dijalog, ali ne i za kompromise koji su u suprotnosti sa našim programskim opredjeljenjima.

Mi, članovi Udruženja, možemo po- moći aktuelnoj vlasti u borbi za jačanje države i njenih ingerencija u svim dijelovima BiH, ali se osjećamo odgovornim i kompetentnim da reaguje- mo na sva odstupanja i truhle kompromise koji dovode u pitanje bilo vrijednosti sačuvane u odbrambenom ratu, bilo perspektivu budućih generacija Bosanaca i Hercegovaca u cjelovitoj i demokratskoj Bosni i Hercegovini u kojoj postoji mogućnost za privredni i društveni prosperitet.

Sa boračkim organizacijama sarađujemo, i saradivaćemo i dalje s ciljem da pomognemo u ostvarivanju legitimnih prava boraca, objedinimo naše djelovanje u zaštiti tekovina borbe za BiH, te da - kao objedinjena, jedinstvena i patriotski opredijeljena organizacija - presudno utičemo na usmjeravanje ispravne državne politike prema sadašnjosti i budućnosti zemlje i zaslužno povoljnog položaja boračke populacije u njoj.

Mi smo spremni na borbu dijalogom i argumentovanom raspravom sa onima koji su ništili BiH a koji se danas ogrću kvazidemokratskim plastom, kao i sa onima koji su za nas navijali ili nas kritikovali sa velike i sigurne daljine, iz debele hladovine evropskih krčmi. Oni nisu razumjevali niti danas razumiju našu borbu, a mi njih pogotovo.

Nažalost, takvi su bili, naročito u vrijeme vlasti Alijanse za promjene, ali ih ima i danas. Kao takvi, prisutni su u institucijama vlasti, jer su prihvatljiviji za međunarodnu zajednicu zbog svoje "čiste" prošlosti iz perioda 1992-1995.

Oni odbranu od agresije ne doživljavaju kao svoj rat te su spremni zarad ličnog interesa minimizirati značaj odbrambenog rata i obespraviti braniocima.

## **VRATITI DIGNITET BRANIOCIMA**

Mi, pripadnici Udruženja, niti možemo, niti ćemo prihvatiti takav odnos prema tekovinama odbrambenog rata. Pogotovo nećemo prihvatiti kriminalizaciju visokih dužnosnika Armije i MUP-a - dokazanih branilaca BiH.

Reagovali smo i stali odlučno u odbranu generala Bahte, Ajnadžića i Vranja, osudili neprimjeren odnos vlasti Alijanse prema haškim optužnicama Hadžihasanoviću, Alagiću i Kuburi, osudili montirani i politički proces protiv Alispahića, Ljevakovića i Mujezinovića, te razobličavali političke i medijske pokušaje poistovjećivanja patriota BiH sa teroristima, kriminalcima i profiterima.

Mi nemamo političkih ambicija i ne borimo se za vlast, ali nismo apolitični. Naša politička ideja vodilja je Bosna i Hercegovina i bosanski građani koji su borci za tu ideju. Rad smo usmjerili u više pravaca, borbu za afirmaciju, predočavanju i čuvanju istine o borbi Armije i njenih pripadnika za opstojnost BiH, pružanje pomoći procesuiranim pripadnicima Oružanih snaga R BiH od strane Haškog tribunala, te za stvaranje uvjeta u zemlji u kojima bi borci dobili zaslužno mjesto u društvu.

Nećemo dozvoliti da se kalja naša borba, minimizira uloga Armije i MUP-a R BiH, da se naša odbrana od agresije naziva građanskim ratom, a mi branioci jednom od "nacionalnih falangi". U našim redovima nema mjesta političkim karijeristima, nego samo onim koji su spremni za samoprijegoran, odgovoran i dugotrajan rad. Očekujemo uključivanje svih dokazanih patriota u rad našeg Udruženja. Nudimo ruku saradnje i aktuelnim vlastima uz već naglašene naše zahtjeve. Neprihvatanje naših stavova i programskih opredjeljenja u djelovanju aktuelnih vlasti moglo bi biti za njih presudno na izborima 2004. godine. Na njima je da se opredijele, a na nama da istrajemo.